

مُنَاجَاتِی پِراگا

عرضال

صاحبزادہ محمد لطیف ساجد چشتی

چشتی کتب خانہ
لاہور، فیصل آباد

مُنَاجَاتِی پِراگا

عرضال

صاحبزادہ محمد لطیف ساجد چشتی

چشتی کتب خانہ
جھنگ بازار فیصل آباد
در بار مارکیٹ لاہور

0308.4572636 0303.2224499

سلسلہ اشاعت: 864

سارے حق ناشری

عرضاں	نام کتاب
ساجد چشتی	مصنف
2026ء	پہلی وار
محمد احمد مجتبیٰ چشتی	طابع
محمد علی چشتی	ٹائٹل
چشتی کمپوزرز	کمپوزنگ
1000/-	ہدیہ

صائم چشتی ریسرچ سنٹر

رحمت ٹاؤن غلام محمد آباد فیصل آباد 7813783-0306

چڑھاوا

سید الساجدین، آدم سادات
حضرت امام زین العابدین علیہ السلام

دے ناں

جنہاں سانوں صحیفہ سجادیہ وچ رب دے حضور
مناجات دا ڈھنگ دسیا

لطیف ساجد چشتی

عرضاں تے آساں

بِسْمِ اللّٰهِ الرَّحْمٰنِ الرَّحِیْمِ

ایہہ مناجاتی پراگا میری اپنی کتھا اے میں کجھ مہینے پہلوں بیمار ہو گیا تے
بیماریاں دا گھیرا اپنے خالق مالک ول ڈھڈوں رجوع کرن لئی فیدہ مند ہو یا۔
ایس حالت وچ اپنیاں کمیاں کوتاہیاں یاد آئیاں اپنے جُرم چیتے آئے تے
اتھرواں دے نال ایہہ ”عرضاں“ اپنے مالک دی بارگاہ وچ پیش کردار ہیا۔
ایہناں ”عرضاں“ وچ بیماریاں تے دُکھاں توں نجات دیاں دُعاواں وی نیں
تے اپنیاں صداواں وی نیں تے اپنیاں سدھراں دا وی اظہار اے۔
میں اپنیاں مجبورییاں تے اوکڑاں مالک نوں دسیاں نیں۔

عرضاں حمد و مناجات میرے دل دی واج اے اوس مالک نوں ماری گئی
اے جہڑا دلاں دے بھیتاں توں واقف اے۔ میں شکر گزار آں اپنے مولا دا
جہنہ میریاں عرضاں سُنیاں تے مینوں اپنی رحمت نال صحت وی عطا کردتی تے
حمد اں لکھن دے اوس کم نوں جہڑا رُک گیا سی اوہ فیر ہون لگ پیتا تے اوہدی
رحمت نال کتاباں چھپن دا وی سربند ہون لگ پیتا تے حمداں دیاں کئی کتاباں
چھاپے چڑھ گئیاں۔ میں سمجھدا ہاں اوہ دُعاواں جہڑیاں عرضاں راہیں اپنے
رب اگے کیتیاں اوہ پوریاں ہو رہیاں نیں۔ ایہدے وچ اپنی تے اپنے وطن
دی خیر وی منگی اے۔ اللہ وی ایہو چوہندا اے پئی اوہدا بندہ اوہدے اگے جھکے
ہاڑے مارے تے اوہدے کولوں ای منگے غیراں ول دھیان نہ کرے۔ رب
سچے کول دُعا اے کہ اوہ میرے جُرم ماں نوں معاف کر دے تے اخیر جنگلی
ہو جاوے۔ مولا کریم ایں تے اپنے بندے دی آس ٹٹن نیں دیندا۔

ساجد چشتی

تعارف

- نام: صاحبزادہ محمد لطیف ساجد چشتی
- تخلص: ساجد (معری) واصل
- ولدیت: حضرت علامہ صائم چشتی رحمۃ اللہ علیہ
- ولادت: 18 دسمبر 1962
- ابتدائی تعلیم: پاکستان ماڈل ہائی سکول فیصل آباد
- تعلیم: بی۔ اے۔ جی سی یونیورسٹی فیصل آباد
- پیشہ: تجارت کتب (چشتی کتب خانہ فیصل آباد)
- متولی: جامع مسجد سیدنا حیدر کرار علیہ السلام
- مہتمم: مدرسہ حیدریہ چشتیہ رضویہ، مدرسہ گلشن زہرا للبنات
- ادبی خدمات: ادبی تنظیمیں دی سرپرستی کر رہے ہیں جنہاں وچ
- جمعیت غلامانِ حسان، حسان نعت کالج، پنجابی بزمِ ادب
- بزمِ صائم انٹرنیشنل (نگران و سرپرست اعلیٰ)
- ماہنامہ محبوب (مجلس ادارت) شاعر 92 نیوز ونگران مشاعرہ
- چھپیاں کتاباں:
- حمدیہ:
- 1۔ حمدیہ ہائیکو (پنجابی)
 - 2۔ سبھے حمدیں رب سوہنے واسطے (حمدیہ بولیاں پنجابی)
 - 3۔ رب دی حمد سناندے ہاں (حمدیہ مایہ پنجابی)
 - 4۔ الرحمن (حمد اردو)
 - 5۔ اللہ ہو داورد (پنجابی حمدیہ قطعات)

منظوم ترجمے:

1۔ قصیدہ امام زین العابدین علیہ السلام (عربی توں اُردو)

2۔ مدح علی علیہ السلام (عربی توں پنجابی)

نعت تے منقبت:

1۔ دروداں دی ڈالی (درود و سلام دی فضیلت وچ منظوم واقعات)

2۔ اصحابِ بدر (قطعاً نشانِ اصحابِ بدر)

3۔ شہیدِ اُحد (مناقب سیدنا امیر حمزہؓ)

4۔ مناقبِ امیرِ ملت (مناقب پیرِ جماعت علی شاہؒ)

5۔ مناقبِ مشائخِ رتہ (مناقب و قطعاً)

6۔ ساقیِ بغداد (مناقب غوثِ اعظمؒ)

7۔ مظہرِ نورِ خدا (مناقب داتا گنج بخشؒ)

8۔ ساجد دیاں رُباعیاں (نعت و منقبت پنجابی)

9۔ کلامِ ساجد (نعت و منقبت انتخاب)

نثر:

1۔ تاریخِ سرازِ شخصیت (سید یونس شاہ کاظمیؒ حالات و خدمات)

2۔ زیاراتِ مقدسہ (سفر نامہ عراق ایران و زیاراتِ تعارف و مناقب)

صاحبزادہ محمد لطیف ساجد چشتی دیاں مناجات ”عرضاں“

شاعر، ادیب، ریسرچ سکالر ڈاکٹر احسان اللہ طاہر

گورنمنٹ کالج (بوائز) سیٹلائٹ ٹاؤن گوجرانوالا

پنجابی ادب وچ تقدیسی ادب نوں رنگ لگ گئے نیں۔ حمد و نعت دے حوالے نال
ہن ایہدے وچ کئی ون سونے تے نویں کم ہوئے نیں۔ صنعتی تے صنفی حوالے نال کئی
شاعراں نویں تجربے کیتے نیں جدوں کہ غزل تے نظم دا پس منظر رکھن والے شاعراں وی
ایہدے وچ فن نوں اک نواں حُسن تے سہپن بخشیا اے۔

مناجاتی حوالے نال پنجابی ادب دا کھلا رصوفی شاعراں ای بڑا موکھلا کرداسی۔
اوہناں دی شاعری تے گوہ کریئے تے سانوں حمد توں بعد حمد دے وچ ای مناجات دارنگ
وکھالی دیندا اے۔ ایس حوالیوں میاں محمد بخش دی ”سفر العشق“ المعروف بہ ”سیف الملوک“
دی مثال دتی جاسکدی اے جہیدے مڈھ وچ اوہناں اپنے رب سونے کولوں اکھراں تے
فن دی خیرات منگی اے تے دعا توں اپنی منثوی دا مڈھ بنھیا اے۔ میاں محمد بخش ہوراں
دیاں کجھ حمدیں وچ مناجات دارنگ ملیا جلیا وکھالی دیندا اے جیویں اوہناں دی کتاب
”تحفہ رسولیہ“ دا اک حمدیہ شعر پیش اے۔

اے رحیما اے کریمہ اے ستار غفارا
میں بُرے دا بھلیاں پچھے ہر جا کر چھٹکارا
جدوں کہ اوہناں دی سیف الملوک وچ اک وکھری مناجات دارنگ ای ہور اے۔

رحمت دا مینہ پا خدایا باغ سکا کر ہریا
بوٹا آس اُمید مری دا کر دے میوے بھریا
لاہ ہنیرا جُہل بُرے دا چانن لا عقل دا
بخش ولایت شعر سخن دی یمن رہے وچ رَل دا

رب جبار قہار سُنیںدا خوف بھلا اِس بابوں
ہے ستار غفار ہمیشہ رحم اُمید جنابوں
پیر وارث شاہ ہوراں اپنی ہیر دے آخرتے جھپڑی دعا کیتی اے یاں منگی اے
اوہ دارنگ ویکھو۔

بخش لکھن والیاں جملیاں نُوں پڑھن والیاں کریں عطا میاں
سُنن والیاں نوں بخش خوشی دولت رکھیں ذوق تے شوق دا چامیاں
رکھیں شرم حیا تُوں جملیاں دی میٹی مُٹھ ہی دے لنگھا میاں
وارث شاہ تمامیاں مومنّاں نوں دین ایمان لقا میاں
مولوی غلام رسول عالمپوری ہوراں اپنی کتاب ”احسن القصص“ وچ رب سوہنے
دی حمد دے ویہن وگادے نیں۔ اوہ دے وچوں کجھ عرضاں ویکھو:

میرے کار حوالے تیرے اے ستار غفارا
عدل کریں میں پکڑیا جاواں فضل کریں چھٹکارا
توبہ دی توفیق اسانوں دیویں پاک خدایا
در اپنے دا رکھ سواں ہر دم شاہنشاہا
قدم نبی دے پچھے سانوں یا رب راہ چلائیں
اندر قوم نبیاں کیتا توں سرور جس تائیں

ساڈیاں ایہناں صوفی تے کلاسیکی شاعراں دی شاعری دعاواں، مناجاتاں تے
عرضاں نال بھری پئی اے۔ ایہناں صوفیاں انساناں نوں اپنے خالق تے مالک اتے رب
العالمین اگے، جہاناں دے پالن ہارا گے جھولی چک کے دعاواں کرنیاں ای تے سکھائیاں
نیں تے نالے پنجابی شاعری دا ڈھ بنھن والے بابا جی فرید الدین گنج شکر ہوراں اپنے من
والیاں نوں ایہوای دسیا اے۔

سرور پنکھی ہیکڑو، پھابی وال پچاس
ایہ تن لہریں گڈ تھیا، سچے تیری آس

وکیہ فریدا جو تھیا، سکر ہوئی وِس
 سائیں باہجوں اپنے ویدن کہیئے کس
 جے جاناں لڑ چھجنا، پیڈھی پائیں گنڈھ
 تیں جے وڈ میں نہ کو، سب جگ ڈٹھا ہنڈھ

ایہ تے سن پنجابی دے مڈھلے شاعر، جہناں لوکاکی نوں رب سوہنے ول موڑیا، لہم
 یلد و لہم یولد اسبق پک کروایا تے اوہناں نوں سدھی راہ ول ٹوریا۔ ہن پنجابی دے
 پہلے مڈھلے نثر نگار ول وی جھاتی ماریئے کہ اوہناں اپنے سے دی لوکاکی نوں کیہ یاد کروایا
 اے۔ اوہ لکھدے نیں:

سچیاں نال مل، سچ کہہ، سچ نال جیو، سچ سن
 سچ جان، سچ سنجان

سائیں تے سائیں والیاں نال ڈنگیائی بھلی ناہیں، جو اکڑی سوا کھڑی
 کسے وڈیائی تے بھلیئے ناہیں، پڑھ کلمہ سچ دا

نوشہ گنج بخش ہوراں وی لوکاکی نوں او سے سچ ول موڑیا جھیرا ایس جگ دی
 حقیقت اے تے لوکاں نوں کلمہ پڑھ کے اپنے مالک نال دل جوڑن دی پریرنا دے کے
 اوہدے اگے عرضاں کرن دی گل کیتی۔

ایہناں دعاواں دا مڈھ ساڈے کلاسیکی تے صوفی شاعراں دعاواں سنن والے
 مالک تے خالق زمیناں تے اسماناں دے کر نہار کرتار کولوں سکھیا اے۔ اوہنے سب توں
 پہلاں اپنے بندے آدم نوں دعا کرن دا ول دیا تے فیر اوہدی دُعا قبول وی کیتی۔ رب
 العالمین دے بندے اج وی اپنے بھلن ہار پیودی دُعا نوں یاد رکھی بیٹھے نیں تے اپنے رب
 اگے جھولی چُک کے آکھدے نیں: رَبَّنَا ظَلَمْنَا أَنْفُسَنَا وَإِنْ لَّمْ تَغْفِرْ لَنَا وَ
 تَرْحَمْنَا لَنَكُونَنَّ مِنَ الْخَاسِرِينَ

[سورة الاعراف، ۲۳]

ترجمہ: اے ساڈے رب! اساں اپنیاں جاناں تے ظلم کیتا اے تے جے توں
 سانوں معاف نہ کریں تے اسیں گھانا پاؤن والیاں وچوں ہو جاواں گے۔

ایسے طراں کچھ ہو رہیں دیاں قرآن وچ ذکر ہو یاں دعاواں ویکھو:

حضرت نوح علیہ السلام دی دعا

رَبِّ اغْفِرْ لِي وَلِوَالِدَيَّ وَلِمَن دَخَلَ بَيْتِيَ مُؤْمِنًا وَلِلْمُؤْمِنِينَ
وَالْمُؤْمِنَاتِ وَلَا تَزِدِ الظَّالِمِينَ إِلَّا تَبَارًا

[سورة نوح: 28]

ترجمہ: ”میرا رب! مینوں تے میرے ماییاں نوں تے جھیڑے میرے گھرا ایمان
دی حالت وچ آئے سارے مومنناں مرداں تے عورتاں نوں بخش دے تے ظالماں لئی
ہلاکت توں اڈ کسے چیز وچ وادھا نہ کریں۔“

حضرت زکریا علیہ السلام دی دعا

رَبِّ لَا تَذَرْنِي فَرْدًا وَأَنْتَ خَيْرُ الْوَارِثِينَ [سورة الانبياء: 89]

ترجمہ: ”میرا رب! مینوں کلیاں نہ چھڈیں تے توں سارے وارثاں توں بہتر ایں۔“
حضرت یونس علیہ السلام دی دعا

لَا إِلَهَ إِلَّا أَنْتَ سُبْحَانَكَ إِنِّي كُنْتُ مِنَ الظَّالِمِينَ

[سورة الانبياء: 87]

ترجمہ: ”تیرے سوا کوئی معبود نہیں۔ توں پاک ایں۔ بے شک میں ای ظالماں
وچوں ساں۔“

پنجابی ادب وچ ایسے سخن دی روایت کتابی حوالے نال تنویر بخاری ہوراں تک
جاندی اے۔ تنویر بخاری ہوری گوجرانوالہ دی تحصیل نوشہرہ ورکاں دے اک پنڈ کڑیال
کلاں دے رہن والے سن۔ اوہناں ساری حیاتی پنجابی ادب دی سیوا کیتی تے پنجابی ادب
نوں کئی تحقیقی، تنقیدی تے تخلیقی کتاباں دتیاں۔ مناجات دے حوالے نال اوہناں دی کتاب
”رَبَّنَا“ نوں اولیت دا درجہ حاصل اے۔ ایہ کتاب پنجابی کلچرل سنٹر کڑیال کلاں، ضلع
گوجرانوالہ توں 1983ء نوں چھپی۔ ایس کتاب دا انتساب اوہناں ”پاک وطن دے ناں“
کیتا سی۔ اپنی ایس کتاب وچ تنویر بخاری ہوراں رب سوہنے کولوں دیس دیاں خیراں

منگیاں سن۔ ایہدے واسیاں دیاں خیراں منگیاں سن۔ ایس کتاب وچوں کجھ شعراں دے نمونے ویکھو:

دے کے نویاں ہمتاں رہا اگے ٹور اسانوں
اپنے فیض خزانے وچوں دے کجھ ہور اسانوں
ہمت دے رہا! کہ پل پل اگے ودھ دے جانیے
کریئے دونوں دُون ترقی، دلی مراداں پائیے
اللہ سائیاں ساڈیاں انھیاں اکھیاں نوں رُشنا دے
لائی ڈانجھ ہنیرے، سانوں چانن دا گھٹ پیا دے
یا اللہ دے ہنر اسانوں، کارِیگر سدوایئے
باہروں نہ منگوائیئے کجھ وی ہر شے آپ بنائیے

ساجد چشتی ہوراں دی کتاباں ”عرضاں“ پنجابی ادب وچ حمدیہ مناجات دی دوجی کتاب اے۔ ایہناں اپنی ساری کتاب وچ کجھ خاص ناواں نال اپنے سوہنے رب نوں یاد کیتا اے جیویں مولا، یا الہی، اے مالکا، والیاتے سوہنیا رہا۔ موصوف نے اپنیاں عرضاں تے دعاواں وچ اپنیاں سدھراں دا اظہار کیتا اے۔ اوہناں اپنی ذات توں لے کے دیس تک تے دھرتی تے وسدے مسلماناں توں لے کے ہر انسان لئی خاص دعاواں کیتیاں نیں۔ صوفیاں فقیراں تے درویشاں نوں تے منگن والیاں نوں پتہ ہوند اے کہ اوہ [الرحمن] اے۔ اوہ بناں رنگ نسل تے مذہب ویکھیاں ہر اک اُتے کرم کردا اے تے رحم کرنا ای اوہدی سب توں وڈی صفت اے۔ نالے اوہ لوک جھیرے اوہدے اگے جھولی چک کے دعاواں منگدے نیں اوہ اوہنوں بڑے ای چنگے لگدے نیں۔ نالے انج وی دُعا نوں عبادت دا مغز آکھیا گیا اے تے جے ویکھیا جاوے تے مسلمان اوہدے اگے اوہدی صفت ثنا کر کے پنچ ویلے دعاواں ای تے منگدے اے۔

ساجد چشتی ہوراں پنجابی ادب نوں جھیرا مناجاتی پراگا دتا اے اوہاناں ای اوہناں ”عرضاں“ رکھیا اے۔ دعا منگنا انسان نوں یاد دواں انداز ہندا اے کہ انسان اپنے مالک

تے خالق دابندہ اے تے سارے کم ایہدی اپنی مرضی نال نہیں ہونے ایس لئی چنگے دی اُمید رکھ کے اپنے مالک اگے پہنچی کرے تے دعا منگے۔

میرے مولا! حمداں ولے دل میرا ہر دم رہوے
ذکر تیرا ہی کراں نہ ہوو کوئی کم رہوے
یا الہی! ذات تیری لا شریک و بے مثال
تیری رحمت دی ضرورت ہر گھڑی اے ذوالجلال
رحمتاں دا نُور رکھ میرے چوہیرے مالکا
ذکر تیرے لئی سدا جاگاں سویرا مالکا
سوہنیا ربا تیرے در اتے آیا اے گدا
صدقہ سوہنے مصطفیٰ دا ایس دی جھولی بچ پا

صاحبزادہ محمد لطیف ساجد چشتی ہوراں دیاں مناجاتاں وچ تن رنگ بڑے سوہنے طریقے نال دکھالی دیندے نیں۔ اک تے اوہناں جھیریاں عرضاں اپنے رب سوہنے اگے کیتیاں نیں، دعاواں سنن والے تے قبول کرن والے اگے جتھ چک کے دعا منگی اے اوہ اوہناں اپنے لئی منگی اے یعنی کہ اوہ اپنی ذات تک رہے نیں اتے ایہدے وچ وی اوہناں جہاناں دے خالق تے رب کولوں علم دار زق منگیا اے تے اوہ نور تے چان منگیا اے جھیریاں اوہناں نوں ہر ویلے حمداں دے آہرے لائی رکھے۔ انسان کمزور تے ماڑا اے اتے ایہنوں ہر ویلے کسے نہ کسے سہارے دی لوڑ ہوندی اے اتے بادشاہیاں دیون والے تے دولتاں ونڈن والے بے نیاز تے رحم کرن والے رب دی رحمت توں وڈا اک مسلمان لئی ہوو کہیڑا آسرا تے سہارا ہو سکدا اے۔

جتھے انسان دیاں تدبیراں مک جان دیاں نیں، جتھے عقلاں جواب دے جان دیاں نیں، ہمتاں وی بے وس ہو جان دیاں نیں تے انسان حوصلہ ہارن لگ پیندا اے اوہ جتھے اوہدے من چوں دعاواں دانور پھٹ دا اے جھیریاں اوہنوں یقین دواندا اے جتن دا، حوصلے

وہن دا، اگے نکلن دا اتے ایہ اوہدی رحمت ای ہوندی اے کہ اوہ لہ یلد و لہ یولد اپنے بندے نوں دعا کرن دا ول سکھا دیندا اے تے اوہنوں دس دا اے کہ میں تے تیری شاہ رگ توں وی نیڑے آں توں مینوں پکار تے سہی میں تینوں جواب دیاں گا۔ ساجد چشتی ہوراں رب سوہنے دیاں حمداں کرن لئی اکھر لفظ تے نور منگیا اے۔ اوہنوں یاد کرن تے رکھن لئی اکسار تاوچ اوہدی رحمت منگی اے تے سوہنے نبی کریمؐ دے صدقے سب کجھ منگیا اے۔ یعنی کہ ساجد چشتی ہوراں اپنیاں عرضاں راہیں اپنے دل دماغ تے روح دیاں ساریاں سانجھاں تے جڑتاں دا دکھالا کردتا اے۔

صاحبزادہ محمد لطیف ساجد چشتی ہوراں دیاں عرضاں دا دوجا وڈا حوالہ اجتماعی اے۔ ایس سانجھی دعا وچ اوہناں دے ضمنی تے ذیلی تن چار حوالے بن جان دے نیں۔ اک تے اوہناں دیس لئی دعاواں منگیاں نیں تے دوجا اوہناں اپنے کریم آقا دی ساری امت لئی دعاواں منگیاں نیں اتے ایس توں اگے ودھ کے اوہ رب سوہنے دی ساری مخلوق تک آ جان دے نیں۔ ایہناں دعاواں توں پتہ لگدا اے کہ اوہ انسان دوست نیں تے انسانیت نال پیار کرن والے نیں اتے اوہناں نوں پتہ اے تے رب سوہنے دا حکم وی اے کہ اوہدے بندیاں نال پیار دی اک ایہ وی نشانی اے کہ اوہناں بارے چنگا سوچیا جاوے دُعا کیتی جاوے تے ساجد چشتی ہوراں ایس گل نوں سوہنے طریقے نال نبھایا اے۔

میرے مولا! ساری ہیں مخلوق دا توہیوں کفیل
مشکلاں تے اوکڑاں وچ ذات تیری اے وکیل
یا الہی! مومنناں دے دل توں آپے پھیر دے
یا الہی! ڈبے ہاں غم وچ بڑی ہی دیر دے
دیس میرے تے ہے آیا ویلا اوکھا ماکا
بھجج کے امداد آپے کر دے سوکھا ماکا

سوہنیا رہا! نبی دی ساری امت بخش دے
توں کریم ایس توں رحیم ایس اپنی رحمت بخش دے
والیا! کر دے عطا صدقہ نبی لچپال دا
والیا! بھر پلا صدقہ مصطفیٰ دی آل دا

صاحبزادہ محمد لطیف ساجد چشتی ہوراں دیاں ”عرضاں“ پنجابی رہتل دے اکھراں
نال بھجیاں ہوئیاں نیں۔ اوہ مالک تے خالق ہر اک دی زبان نوں سمجھاتے جان دا اے
سگوں اوہ تے بناں اکھراں توں اکھراں دی زبان وی سمجھ لیند اے بلکہ اوہ تے دلاں وچ
پنگرن والیاں آساں تے امیدیں توں وی واقف اے پر اوہ آپ آکھدا اے کہ میرے
اگے عرضاں کر دے رہو ایہدے نال اک تے بندے نوں اپنی بندگی یاد رہندی اے
اوہدے اندر عاجزی تے انکساری آؤندی اے تے دو جاساڈے مالک تے خالق نوں ایہ
چنگا وی لگدا اے کہ اسیں اوہدے کولوں ہر ویلے منگیے۔ ساجد چشتی ہوراں وی ہر ویلے اپنے
دیس لئی، اپنے لئی دعاواں منگیاں نیں۔ اوہناں دیاں عرضاں وچ کل مومنوں لئی دعاواں
نیں۔ پنجابی ادب نوں ساجد چشتی ہوراں عرضاں تے دعاواں دا جیہڑا رنگ ڈھنگ دتا اے
اوہوں پتہ لگدا اے کہ اوہناں دیاں سوچاں نوں مولا کریم تے رنگ لائے نیں۔ اتے اوہ
جہنوں اپنے رنگ وچ لوے اوہ فیر ہر ویلے اوہدے بوبے اگے ای عرضاں کر دا اے۔

یا الہی مومنوں دے دل توں آپے پھیر دے
یا الہی ڈبے ہاں غم وچ بڑی ہی دیر دے
یا الہی آس دی ٹہنی وی کر دیویں ہری
توہیوں پھلاں نال دعا دی ہے جھولی بھری

ساجد چشتی ہوراں دیاں عرضاں، مناجاتاں تے دعاواں وچ جتھے پنجابی دی
صوفیانہ تے کلاسیکی روایت اگے ٹردی دس دی اے اوہتھے اوہناں جدید سمنوں مکھ رکھ
کے وی گل کہتی اے۔ اوہناں کول اجتماعی تے قومی حوالہ بڑا مضبوط تے پکا پیڈ اوکھالی دیندا

اے۔ اوہ اپنے وچاراں نوں سانجھا کر دیاں تے اپنیاں سوچاں احساساں دا دکھالا کر دیاں
اپنے دیس دے لوکاں دے دکھ درد تے مسئلیاں نوں وی سامنے رکھ دے نیں۔ اک رنگ
اوہناں دیاں عرضاں تے مناجاتاں وچ ایہ وی اے کہ اوہ پہلے رب سوہنے دی حمد کر دے
نیں، اوہدیاں صفتاں بیان کر دے نیں تے کدے کدے اوہدیاں صفت ثنواں بیان
کر دیاں ایسے ڈب جان دے نیں کہ اوہناں نوں اپنیاں عرضاں کرنیاں یاد ای نیں رہندیاں
اتے اوہناں دا ایہ حوالہ تے ایس طراں دا اسلوب پڑھنہاراں نوں سوہنا لگدا اے۔

تیرے کولوں تیری ہی رحمت ہے منگی ماکا
میرے سُنے دی ملے تعبیر چنگی ماکا
ہر گھڑی رحمت تری نوں واجاں ماراں ماکا
لائی رکھیں توں میرے گھر وچ بہاراں ماکا

ساجد چشتی ہوراں دادل کر دا اے کہ اوہ حمد لکھ دے جان، حمد دی کتاب اُردو تے
پنجابی دی چھپ دی جاوے، پڑھنہار پڑھ دے رہن، رونق لگیاں لگیاں رہن تے خیالاں
فکراں دے ویہن وگدے رہن۔ ربا سوہنیا اوہناں دے ایہ وچار، دعاواں، عرضاں تے
مناجاتاں جھیڑیاں صرف اوہناں دیاں ای نیں تیرے ساریاں اوگنہار بندیاں دیاں
نیں، ایہناں نوں قبول کر، تے سانوں حمد اں کرن دی توفیق دے۔

ساجد چشتی ہوراں پنجابی دے شعری پڑ وچ جھیڑ اک نواں بوہا کھولیا اے اے
تک اودھروں جھیڑی ٹھنڈی ہوا آرہی اے اوہدے وچ تقدیس دیاں خوشبو یاں رچیاں
ہونیاں نیں۔ رب سوہنے تے اوہدے آخری نبی دیاں نعتاں دی واشعارچی ہوئی اے۔
اہل بیت نال محبت تے عقیدت دا چائن ملیا ہو یا اے۔ رب کرے ایہ ہوا ایراں ای چل
دی رہوے تے میاں محمد بخش دے آکھن مطابق:

دیں بہار سدائیس باغے کدے خزاں نہ آوے۔ آمین

محمد لطیف ساجد چشتی دیاں دُعائیہ مناجات

ادیب، ریسرچ سیکالر پروفیسر ڈاکٹر محمد ایوب

حمد و مناجات دامطالعہ کرن توں پہلاں سانوں حمد تے مناجات دے فرق بارے جانکاری ہونی چاہی دی اے۔ ”حمد“ عربی زبان دا شبد اے جس دے لغوی معنی تعریف کرنا تے صلاح دے نیں۔ پنجابی تے انگریزی زبانوں دی گرامر موجب کسی شبد دے لئی خاص کرنا ہووے تے عربی وچ ”ال“ تے انگریزی وچ ”The“ لاء کے راکھواں کردتا جاندا اے۔ پوتر پوتھی قرآن وچ سورۃ فاتحہ ایس دی اگھڑویں مثال اے، ایس سورۃ نوں اسی الحمد شریف وی آکھدے آں۔ ”الحمد“ دے ارتھ خاص تعریف دے نیں، تے ایہہ شبد اللہ تبارک و تعالیٰ لئی اے، ایس دامطلب صاف اے کہ ایہہ شبد خاص الخاص ذات باری تعالیٰ لئی مخصوص اے۔ انج ای ”مناجات“ وی عربی شبد اے۔ ایس دے ارتھ ”کن وچ گل کرن“ دے نیں جدوں اسیں رب توں کجھ منگدے ہاں تاں ایہو مناجات اے۔ رب قاضی الحاجات اے اوہ ساڈیاں لوڑاں پوریاں کردا اے۔ اسیں اوہ ذات دی عبادت کردے آں تے اوہ کولوں مدد منگدے آں۔ جدوں بندہ یاں کوئی رب العزت توں کجھ منگدا اے۔ دُعا کردا اے تاں اجہی شاعری نوں ”مناجات“ آکھیا جاندا اے۔ مناجات دی تعریف انج کیتی جاسکدی اے۔ مناجات دے معنی رب نال راز و نیاز دیاں گلاں کرنا، دعا کرنا، بنتی کرنا، کن وچ گل کرنا، خاص طور تے رب دی بارگاہ وچ عاجزی نال کیتی جاوے والی دُعایا عرضی ہوندی اے، جس وچ بندہ اپنیاں لوڑاں بیان کردا اے۔ ایہہ اک اجہی دعا ہوندی اے جس وچ بندہ اپنے رب نال سدھے طور تے کلام کردا اے۔

ساہت اندر کوتائیاں نتر دے اوہ شبد جو ربی تعریف تے اپنی عاجزی دے اظہار
نال دُعا کیتی جاوے۔ ایس دا اصل مطلب خدا دے نال نرمی، عاجزی تے رازداری نال گل
بات کرنا ایس تاں جے اوس کولوں مدد تے بخشش منگی جاسکے۔ جو دُعا دا اک خاص تے پُر خلوص
ڈھنگ اے۔ منکھ حیاتی وچ اوکڑاں دا سامنا کر دا اے جو رب دے بندے ہوندے نیں
تے جو منوں اوس دا غلام ہوون دا اقرار کردے نیں۔ اوہناں دے سامنے پریشانیاں تے
اوکڑاں ٹھہریاں نہیں۔ اوہ اپنے رب کولوں دُعا راہیں ہر دُکھ تے پریشانی توں مکتی حاصل
کر لیندے نیں جو یں محمد لطیف ساجد چشتی ہوراں اپنے منا جاتی پراگے ”عرضاں“ وچ کیتا
اے جدوں ساجد چشتی ہوراں دے ایس پراگے دے سرنا نوں اتے گوہ کریئے تاں
ساہنوں ایہہ تن حصیاں وچ ونڈے دکھالی دیندے نیں۔ پہلاں اوہناں رب دے سامنے
اپنیاں غلطیاں گناہاں دا اعتراف کیتا۔ ایس مگروں ربی صفتاں نوں بیان کیتا تے فراوس
ذات کولوں مدد منگی۔ لکھدے نیں۔ میں تیرا بوہا چھڈ کے غیراں کولوں منگی تے منگن توں نہ
سنگیا۔ مالکا توں ای معاف کرن والا ایں۔

تیرا بوہا چھڈ کے غیراں توں منگی مالکا

ایس بھیڑے کم توں میں کد ہاں سنگیا مالکا

اوہ اپنیاں کیمیاں تے کوتاہیاں دا اظہار مالک دے حضور کردے نیں کہ اے
میرے مالک توں مینوں نعمتاں دان کیتیاں پر میں سدا تینوں بھلائی رکھیا تے تیریاں دتیاں
نعمتاں لوکاں دے نانویں لایاں۔

تیرا کھا کے ہوراں دے میں نانویں لایا مالکا

نعمتاں لئیاں سدا تینوں بھلایا مالکا

تیریاں تے رہیاں نے ہر دم عطاواں مالکا

کیتیاں میں جان بجھ کے خطاواں مالکا

ساجد چشتی لکھدے نیں کہ مولا ایہہ سارے کارے میں نفس ہتھوں مجبور ہو کے
کیتے تے تُوں میرے عذروں من کے معافی عطا فرما۔

نفس ہتھوں ہو گیا مجبور ہاں میں مالکا
عذر من میرا کہ بس معذور ہاں میں مالکا
مینوں ایس گل تے بڑی شرمندگی اے۔

مینوں اس گل تے بڑی شرمندگی اے مالکا
تیتھوں رہ کے دُور گذری زندگی اے مالکا
میں کوڑا ہاں ایس گل تے وی مینوں وڈی شرمندگی اے میں ساری عمر کراہے پے
کے لنگھادی۔

میں ہاں کوڑا، کوڑ میرا وی پھبا دے مالکا
نفس میرے نوں مرے مگروں ای لاہ دے مالکا
سدھی راہ چھڈ کے سدا ٹُریا گراہے مالکا
عمر لنگھ گئی مینوں رکھ ہُن سدھی راہے مالکا
میں نیکی بدی وچ کدے فرق نہیں کیتا تے عشق نوں چھڈ کے عقل کچھے لگا رہیا۔

عشق چھڈ کے عقل دے کچھے ہاں چلیا مالکا
ایسے لئی درداں غماں نے مینوں دلیا مالکا
اے میرے مولا! توں حکیم ایں تے تیری ذات میری سب نوں بالاتر اے سارا
فلک تے بحر و بر تیرے قبضے وچ اے۔

میرے مولا! تُوں حکیم ایں حکمتاں سب تیریاں
ذات تیری نوں سمجھ پاوَن ناں سوچاں میریاں
میرے مولا! تُوں قدیم ایں تُوں ایں اقدم، مُقتدر
تیرے قبضے وچ حُدایا سب فلک تے بحر و بر

تو ایں عظیم ایں خالق تے کریم۔ توں نعمتاں دے مونہہ کھولدا ایں توں عظمت
والا ایں تے سب دی اپنے کرم نال بخشش کردا ایں۔

میرے مولا! تُوں عظیم ایں تُوں ایں خالق تُوں کریم
نعمتاں دے کھولدا ایں تُوں ای جنتِ نعیم
میرے مولا! تُوں عظیم ایں عظمتاں تیرے لئی
کر کرم رکھ لے بھرم گھل بخششاں میرے لئی

اے میرے سونہارا بامینوں جھوٹ تے غیبت توں بچائیں میں ہر ویلے حق تے
سچ دے ہو کے دے نال تیرا ذکر کردار ہیواں تیرے بن میرا کوئی سہارا نہیں ہے۔

میرے مولا! جھوٹھ تے غیبت توں میں بچ دارہواں
ہو کا دیندا ہر گھڑی میں حق تے سچ دا رہواں
میرے مولا! ذکر کردار میں تیرا ہر گھڑی
میریاں اکھاں نوں دیدے مولا اشکاں دی جھڑی
میرے مولا تیرے بن درداں دا چارا کون ایں؟
تیرے باہجوں مالکا میرا سہارا کون ایں؟

اے اللہ میرا سینہ حمد لکھن لئی کھول دے تے لفظاں نوں شان تے سوچاں نوں
ادن دے سمر تھہ کر دے۔

میرے مولا! میرا سینہ حمد دے لئی کھول دے
مینوں سچے لفظ دیدے مینوں سوہنے بول دے
میرے مولا! شان تیری میرے لفظاں توں ورئی
سوچ میری بہت نیویں توں ایں مولا کبریا

میرے مولا ! ہر طراں دی مہربانی کر دوں
 میریاں سوچاں تُوں وی اُڈن دی خاطر پر دوں
 ساجد چشتی ہوراں ایس حمدیہ مناجاتی پراگے وچ جتھے اپنے بُرماں دی معافی منگ
 دے نظر اوندے نیں او تھے اوہ اپنے ملک دی حالت تے رب کولوں رحمتاں دی التجا
 کر دے نیں۔ ملک وچ ہون والی دہشتگردی تے فتنیاں توں نجات واسطے وی اللہ دی بارگاہ
 وچ عرضاں کر دے نیں۔

مکدی گل ایہہ کہ محمد لطیف ساجد چشتی ہوراں دامنِ مناجاتی پراگا ”عرضاں“ وچ درج
 شاعری ہر پڑھن والے دے دل دی واج تے دُعا اے، کیوں جے ایہہ مناجات آسان
 زبان وچ ہوون کارن پڑھن والے نوں اپنی سوچ دی عکاس جاپدی اے۔ اوہناں نیں
 عربی شبد دی ورتوں تے قرآنی آیات د احوالہ دے کے دھرم نال اپنے گوہڑے سانگے دا
 ثبوت وی دتا اے۔ ایس پراگے وچ بے شمار فنی خوبیاں اوہناں دی کوتاہی تے پکڑنوں ظاہر
 کر دی اے۔ میں پنجابی دے حمدیہ ساہت اندر ایس پراگے دا نگھا سوا گت کردا ہاں تے
 محترم محمد لطیف ساجد چشتی ہورں نوں دلوں ودھائی دیندا ہاں۔

میرے مولا

میرے مولا! مینوں وی نُورِ بصیرت بخش دے
 حمد تیری کردا راں لفظاں دی دولت بخش دے

میرے مولا! عشق اپنے دا خزینہ بخش دے
 مینوں وی ذکر اپنے دا سُچّا نگینہ بخش دے

میرے مولا! حق بیانی ہی مرے لب تے رہوے
 ذکر تیرے دی گل افشانی مرے لب تے رہوے

میرے مولا! جھوٹھ تے غیبت توں میں بچ دا رہواں
ہوکا دیندا ہر گھڑی میں حق تے سچ دا رہواں

میرے مولا! ہر طراں دی مہربانی کر دوں
میریاں سوچاں نوں وی اڈن دی خاطر پر دوں

میرے مولا! عصر دے صدقے خسارے دُور کر
میرے مولا! میریاں سوچاں وی نُور و نُور کر

میرے مولا! تُوں ایں مُحسن میرے تے احسان کر
دان کر حمداں دے موتی مولا مینوں دان کر

میرے مولا! ذکر کردا راں میں تیرا ہر گھڑی
میریاں اکھاں نوں دیدے مولا اشکاں دی جھڑی

میرے مولا ! حمداں کہندا ہی رہاں میں رات دن
ذکر تیرے وچ ہی رُجھیا رہاں میں رات دن

میرے مولا ! تیرے ہاتھوں کوئی وی میرا نہیں
ہے نموشی ایس گل تے بنیاں میں تیرا نہیں

میرے مولا ! سجدیاں دی مینوں وی لذت ملے
سرفرازی کر عطا دُنیا دے وچ عزت ملے

میرے مولا ! میں کھلارے جھل میں ہاں بھل گیا
ایس دُنیا خصماں کھانی تے میں کاہنوں ڈھل گیا

میرے مولا ! غفلتاں دی نیندرے سُتا رہیا
مکر کر کے غیراں کولوں سار دا بتا رہیا

میرے مولا! نال تیرے تند سدھی پائی نہیں
پکا ہو کے نال تیرے یاری میں لائی نہیں

میرے مولا! تُو رحیم ایں رحم دی رکھیں نظر
رحم پرور ذات تیری رحم بس میرے تے کر

میرے مولا! تُوں غنی ایں بخش دے مینوں غنا
اپنے ولے لائی رکھیں غیر توں مینوں بچا

میرے مولا! تُوں عظیم ایں عظمتاں تیرے لئی
کر کرم رکھ لے بھرم گھل بخششاں میرے لئی

میرے مولا! تیریاں صفتاں سناواں رات دن
تیرے سوہنے ناواں نوں رو رو پکاواں رات دن

میرے مولا! حمداں ولے دل میرا ہر دم رہوے
ذکر تیرا ہی کراں ناں ہوو کوئی کم رہوے

میرے مولا! شان تیری میرے لفظاں توں ورئی
سوچ میری بہت نیویں توں ایں مولا کبریا

میرے مولا! ذات تیری قادر و دیان ایں
تُوں کریم ایں تُوں نصیر ایں صاحباً سُبْحان ایں

میرے مولا! حاکماں دا تُوں ایں حاکم بالیقین
کائناتاں ساریاں ای تیرے نے زیرِ نگین

میرے مولا! ساری ہیں مخلوق دا تُوہیوں کفیل
مشکلاں تے اوکڑاں وچ ذات تیری اے وکیل

میرے مولا! ذات تیری اُچی اے ادراک توں
تیری کیہ تعریف ہووے مولا نیویں خاک توں

میرے مولا! وَاسْتَغِيثُوا تے عمل کردا رہواں
تیرے گل احکامِ قرآنی تے میں چل دا رہواں

میرے مولا! میرا سینہ حمد دے لئی کھول دے
مینوں سچّے لفظ دیدے مینوں سوہنے بول دے

میرے مولا! مُشْرِكَاں دا رَدّ سدا کردا رہواں
ایہو ای منگاں تے ایہو ای دُعا کردا رہواں

میرے مولا! تُو رحیم ایں رحمتاں کردا رہویں
میری جھولی تُوں کرم کر کے سدا بھر دا رہویں

میرے مولا! تُوں حکیم ایں حکمتاں سب تیریاں
ذات تیری نوں سمجھ پاوَن ناں سوچاں میریاں

میرے مولا! تُوں قدیم ایں تُوں ایں اقدم، مُقتدر
تیرے قبضے وچ خُدا یا سب فلک تے بحر و بر

میرے مولا! نال ساہواں تسبیاں کردا رہواں
مالکا مُجرا تِرا دن رات میں بھر دا رہواں

میرے مولا! تُوں عظیم ایں تُوں ایں خالق تُوں کریم
نعمتاں دے کھولدا ایں تُوں ای جَنّا تِ نعیم

میرے مولا! ذات تیری شاہد و مشہود اے
ہور تیرے باہجھوں کجھ وی ناں کتے موجود اے

میرے مولا! تُوں ایں باعث ہے صفت تیری شہید
تُوں قدیر ایں تُوں ایں قادر تُوں ایں ماجد تُوں مجید

میرے مولا! تُوں ایں محصى گھیرے وچ تیرے جہان
ہر طرف دسدے نے مولا تیری قُدرت دے نشان

میرے مولا! بادشاہاں تے ہے تُوہیوں حکمراں
کون دسے تیری عظمت شان ، مولا خوبیاں

میرے مولا! واسع تُوں ایں تیری قُدرت ہے کمال
ذات تیری بے نظیر و بے مثال و لازوال

میرے مولا! ظالماں تے جابر و قہار ایں
ہر شے تیری دسترس وچ تُوہیوں بس مختار ایں

میرے مولا! تُوں ایں باسٹ تُوہیوں ایں روزی رساں
تیری تسبی کر رہی ذرّے ذرّے دی زباں

میرے مولا! تُوں مصور صورتاں ایں لیک دا
تینوں مولا سب پتہ اے میرے اندر تیک دا

میرے مولا! تُوں ایں ہادی دےیں صراطِ مستقیم
تُوں ایں والی تُوں ایں ناصر میرے مولا تُوں عدیم

میرے مولا تیرے بن درداں دا چارا کون ایں؟
تیرے باہجوں مالکا میرا سہارا کون ایں؟

یا الہی

یا الہی ! ذات تیری لا شریک و بے مثال
تیری رحمت دی ضرورت ہر گھڑی اے ذوالجلال

یا الہی ! مالکِ ایں ملکاں دا تُوں حاکم ایں تُوں
ہے ہر اک شے نوں فنا باقی ہیں تو دائم ایں تُوں

یا الہی ! میرے تے کر دیویں رحمت دی نظر
تیرے بُوے آگیا ہاں میری خالی جھولی بھر

یا الہی ! تیری رحمت تے کرم دی لوڑ اے
سبھ بھرے تیرے خزانے تینوں کاہدی تھوڑ اے

یا الہی! شان تیری دا نواں ہر دم ظہور
مِل رہیا سارے جہاناں نوں ترے نوروں ای نور

یا الہی! سدھے راہے پاویں اِس نادان نوں
جان سکیا ای نہیں کھلا جھلا تیری شان نوں

یا الہی! تیرا کوئی ثانی نہیں ہمسر نہیں
بند کردا توں کسے ویلے وی اپنا در نہیں

یا الہی! تُوں ایں دیندا ہر شے نوں عدموں وجود
کائناتاں نوں ملی اے تیرے ای نوروں نمود

یا الہی! تُوں ایں اوّل تُوں مُقَدّم تُوں قدیم
تُوں ایں کلا تُوں ایں یکتا ہے کدوں تیرا سہیم

یا الہی! پُورنے پاوندا ہاں تیرے نام دے
میرے اُتے رحم کردے بخششاں دے جام دے

یا الہی! تیرے باہجھوں حامی کوئی میرا نہیں
تُوں عطاواں کیتیاں پر بنیاں میں تیرا نہیں

یا الہی! تیرے نوروں تارے چمکاں مار دے
کر تجلی رحمتاں دی میرا سینہ ٹھار دے

یا الہی! صدق دی دولت عطا کر بے بہا
دور کردے میرے دل چوں کبر، نخوت تے ریا

یا الہی! تیرے باہجھوں کون پالنےہار اے
کون طوفاناں چوں تیرے باہجھ کردا پار اے

یا الہی! تیرا در مخلوق لئی دار الاماں
تیرے باہجھوں کون کرسکدا بھلا انج رحمتاں

یا الہی! توں ایں قادر تیری قدرت بے بہا
تیرے باہجھوں کون مولا مشکلاں نوں ٹال دا

یا الہی! توں ایں رازق رزق گھلا کر عطا
تیرے بُوے آگیا ہاں ٹھیڈے کھاندا مالکا

یا الہی! کُن کہہ کے دیندا ایں سب کجھ بنا
تُوں مصوّر نقشے وکھرے وکھرے ہیں لیکدا

یا الہی! ذات تیری بھیت دل دا جان دی
حد بندی کر نئیں سکدا کوئی تیری شان دی

یا الہی! تیری رحمت ہاں سدا میں ٹول دا
تیرے در تے آگیا ہاں ڈگدا تے ڈول دا

یا الہی! کر کرم کہ ذات تیری ہے کریم
رحم فرما دے خدایا توں ایں ارحم توں رحیم

یا الہی! تیرے قبضے وچ ہواواں دا اے زور
تیرے ہاتھوں بدلاں نوں کوئی وی سکدا نہیں ٹور

یا الہی! پدھری توہیوں وچھائی اے زمین
قبضے تیرے وچ ای مخلوق دا اے مرن جین

یا الہی! کوئی نہیں جو میرے مسئلے حل کرے
تیرے ہاتھوں کون جو دکھاں دے مٹھے سل کرے

یا الہی! درد منداں دے ونڈاویں درد توں
توں مکرم تُوں کریم ایں سب دا ایں ہمدرد توں

یا الہی! مومناں دے دل توں آپے پھیر دے
یا الہی! دُبے ہاں غم وچ بڑی ہی دیر دے

یا الہی! تیرے ہاتھوں کون لاہوے بھار بھار
تیرا ای ہر چیز تے ہے مولا کُلی اختیار

یا الہی! تیرے لئی نیں رفعتاں وڈیاں
تیریاں ای رحمتاں ہر پاسے مولا چھایاں

یا الہی! اک توں اک وَدّھ خلقیا شہکار توں
ذّرے وچ ایٹم نوں رکھیں مالک و مختار نوں

یا الہی! دلِ نوں موہ لیندی تری کاری گری
ہے ہر اک شے وچ مولا تیری قدرت دِسدی

یا الہی! رات دی کُکھ چوں سویرے توں دوں
اپنی قدرت تھیں دِناں نوں مولا پھیرے توں دوں

یا الہی! توہیوں کھچ دا دل چوں غم دے تیراں
توہیوں مولا دیندا خواہاں نوں مرے تعبیراں

یا الہی! توہیوں سُورج چڑھدیوں ایں چاڑھ دا
لہندے دی کوٹھی دے وچ ایں راتیں مولا تاڑ دا

یا الہی! آس دی ٹہنی توں کردیویں ہری
توہیوں پھلاں نال دھرتی دی وی ہے جھولی بھری

یا الہی! تیریاں شاناں دا نہیں حد و حساب
جو وی تُوں ایں خلقیا سبھ خلقیا اے لاجواب

یا الہی! اپنی قدرت نوں ایں توہیوں جان دا
توہیوں خالق ایں جہاناں دا توں مالک جان دا

یا الہی! تیرے اگے جھکدے نے شاہواں دے سر
تُوں ایں سچا پادشاہ تے تُوہیوں مولا مُعتبر

یا الہی! توں ایں حاکم کول تیرے اقتدار
توں دناں نوں پھیر دا لوکاں دے وچ ہیں بار بار

یا الہی! حکم تیرا اے جہاں تے چل دا
تیرے حکموں باجھ مولا پتہ وی نہیں ہل دا

یا الہی! تُوں دوں تے پُوریاں نیں پندیاں
ترے حکموں پنچھیاں نوں چُوریاں نیں پندیاں

یا الہی! کیتا اے ساجد نوں عملاں نے تباہ
رحم کردے رحم کردے اے کریم اے بادشاہ

مافیاں دیہہ مالکا

حمد کردا راں تری توفیق دے دے مالکا
اپنے ذکر و فکر دی تشویق دے دے مالکا

تیرا اُچّا نام تیری ذات اُچی مالکا
ہر صفت تیری اے اعلیٰ بات اُچی مالکا

تُوں دِلاں دے بھیت جانیں تُوں علیم ایں مالکا
تُوں عظیم ایں تُوں کریم ایں تُوں حلیم ایں مالکا

ذات تیری مُدھ قدیموں ای اُحد اے مالکا
ناں تری اولاد ناناں ماپے ناناں جد اے مالکا

تُوں ایں باقی ساری ہے مخلوق فانی مالکا
ہر طرف جلوے ترے ، ہر سُو نشانی مالکا

جد کرم تیرے دی پے جاندی اے جھاتی مالکا
مُردہ دھرتی تُوں وی مل جاندی حیاتی مالکا

کر دا تُوں ایں پتھراں چوں چشمے جاری مالکا
تیرے در توں رج دی مخلوق ساری مالکا

بات دل دی میں فقط تینوں سناواں مالکا
تیرا در چھڈ کے بھلا میں کتھے جاواں مالکا

تر لے میرے سُن لے درداں نوں مکادے مالکا
مشکلاں بیماریاں نوں نگروں لاه دے مالکا

جُرم دی راہ توں کرم کر کے ہٹا دے مالکا
میرے دل نوں اپنے ای پاسے لادے مالکا

تیرے در تے دھون ایں آ کے جھکائی مالکا
روڑھ بیٹھاں ہتھیں اپنی کُل کمائی مالکا

چن خوشیاں دا چڑھے مگن ہنیرے مالکا
رحمتاں دے ہُن نوں پھٹن سویرے مالکا

دل دے تھل وچ فیر آوے سبز موسم مالکا
کر رہیاں عرضاں میں لے کے چشمِ پُرنم مالکا

بھل میری ویکھ ناں اپنا کرم تک مالکا
میرے دل چوں کڈھ دے ہر وہم تے شک مالکا

لنگ میرا رکھ لئیں ناں خوار ہوواں مالکا
کیتیاں جُرماں نوں سوچاں تاہیوں روواں مالکا

کر کرم میرے تے سائیاں اوکڑاں کٹ مالکا
کم ہن میرے بنادے سارے جھٹ پٹ مالکا

جُرم تے شرمندگی اے ماف کردے مالکا
میریاں جُرماں دا کھاتہ صاف کردے مالکا

آس دی دُب چلی اے بیڑی ترادے مالکا
غم دیاں طوفاناں وچوں پار لادے مالکا

رُوحِ نُوں وی لگے پھٹ ہُن لا دے مرہمِ مالکا
اُگ ہُن درداں غماں دی ہووے مدھمِ مالکا

مُشکلاں دے واورولے مینوں گھیرن مالکا
میریاں اُمیداں اُتے پانی پھیرن مالکا

تیرے کولوں تیری ہی رحمت ہے منگی مالکا
میرے سُننے دی ملے تعبیرِ چنگی مالکا

عرض میں تیرے ہے درتے ایہو کیتی مالکا
شکوایاں ولّوں رہوے ایہہ جیہہ سیتی مالکا

ہر گھڑی رحمت تری نوں واجاں ماراں مالکا
لائی رکھیں تُوں میرے گھر وچ بہاراں مالکا

دُور کر دیویں کرم تھیں سب خسارے مالکا
تیرے بُوے آگیاں جھولی پسارے مالکا

کیتیاں ناں کیتیاں دی دیویں مانی مالکا
بس کرم رکھیں مرے تے تُوں اضافی مالکا

تیرے حکماں نُوں پرے ہواواں کدی ناں مالکا
گھر مرے دل وچ کرے آکے بدی ناں مالکا

ذکر تیرے نال رکھاں جیہہ نُوں تر مالکا
مہکے ہر دم ذکر تیرے تھیں مرا گھر مالکا

ذکر تیرے وچ رہوے دل میرا رُجھیا مالکا
ہوراں وٹوں دل دا دیوا رکھیں بجھیا مالکا

رحمتاں دا نُور رکھ میرے چوہیرے مالکا
ذکر تیرے لئی سدا جاگاں سویرے مالکا

میریاں بدیاں نُوں نیکی وچ بدل دئیں مالکا
گور وچ توں رحمتاں دا نُور گھل دئیں مالکا

نفس دی ہاں قید وچ مینوں چھڑا دے مالکا
سوچ میری صرف اپنے وٹے لا دے مالکا

آس دے سب بُوٹیاں تے بُور آوے مالکا
خوف درداں دی خزاں دا دُور جاوے مالکا

وہو مَعَكُمْ دے وچ رکھ مینوں شامل مالکا
تیری سردل سر مرے دی ہووے منزل مالکا

پاک کردیویں کرم تھیں میری خلوت مالکا
میری خلوت وچ رہوے رحمت دی جلوت مالکا

رزق دیویں پاک نالے دیویں چوکھا مالکا
ناں کسے دے نال ہووے میتھوں دھوکھا مالکا

تیرے دتے وچوں دیواں گھلے ہتھیں مالکا
ونڈی جاواں ، ونڈی جاواں ایناں دیویں مالکا

بھکھیاں دے واسطے صُفرا وچھاواں مالکا
کر عطا ایناں کہ ہوراں نُوں کھواواں مالکا

میرے دل دے ویہڑے وچوں غیر کڈھ دے مالکا
نفس میرے نُوں کرم تھیں آپے وڈھ دے مالکا

رولیا اے نفس میرے مینوں تھان تھان مالکا
کر علاج ایہدا ترے در اُتے آیاں مالکا

مینوں اِس گل تے بڑی شرمندگی اے مالکا
تیتھوں رہ کے دُور گذری زندگی اے مالکا

عشق چھڈ کے عقل دے پچھے ہاں چلیا مالکا
ایسے لئی درداں غماں نے مینوں دَلیا مالکا

سدھی راہ چھڈ کے سدا ٹُریا گُراہے مالکا
عمر لنگھ گئی مینوں رکھ ہُن سدھی راہے مالکا

نیک و بد وچ ناں کدی کیتا میں فرق اے مالکا
غفلتاں دے بحر وچ رُوح رکھی غرق اے مالکا

کھیسے وچ جُرمِاں دی میں رکھی کمائی مالکا
دُور اے آپے میں کیتی ہر بھلائی مالکا

میں تے مجرم ہاں توں آپے مافیاں دیہہ مالکا
اپنے اُتے جُرمِاں دی پائی میں ہے کھیسہ مالکا

سرتوں پیراں تک خطا ای ہاں خطا میں مالکا
توں کریم ایں تیری رحمت منگ رہیا میں مالکا

رحم کر ستار ایں توں پردہ پوش ایں مالکا
ماف کر دا دوشیاں دے تُوہیوں دوش ایں مالکا

بھٹکیا ہویا ساں تاہیوں پھریاں در در مالکا
ایسے گلّوں گور کالی توں رہیاں ڈر مالکا

ذکر تُوں دُوری نے دل کیتا اے کالا مالکا
مہر کر کے بھر دوں اِس وچ اُجالا مالکا

اپنے دل دا حال بس تینوں سناواں مالکا
غیر دے بُوے تے ناں ہُن مُول جاواں مالکا

تیرے باہجھوں کوئی وی میرا نہیں دردی مالکا
دُور کر دے ساری ظُلمت آپے شر دی مالکا

رحم کر دے رحم کر دے رحم کر دے مالکا
پلے بھر دے پلے بھر دے پلے بھر دے مالکا

کھول دے ہُن رحمتاں دے کھول دے در مالکا
دُور کر دے میریاں راہواں دے پتھر مالکا

سُن لوئیں عاصی دیاں بے وسِ ہاواں مالکا
گھل بہاراں دُور کردیویں خزاواں مالکا

جو لکھے میرے عمل منکر نکیراں مالکا
پھیر دیویں فضل تھیں سب تے لکیراں مالکا

تُوں ای ایس میرا مسبب تُوں سبب ایس مالکا
پال دا ایس تُوہیوں سبب تُوں سبب دارب ایس مالکا

تُو قدر ایس مقتدر ایس تُوں ایس قادر مالکا
تُوں ایس وارث تُوں ایس حامی تُوں ایس ناصر مالکا

رحم کیتا تُوں سدا بھلیا رہیا ہاں مالکا
کر کرم میں تیرے بُوہے تے کھڑا ہاں مالکا

تکڑی وچ میرے عملاں نوں ناں تولیں مالکا
میرے جُرمّاں دی کدی ناں پنڈ کھولیں مالکا

میں ہاں شرمندہ کہ ہاں میں بہت مندا مالکا
منگ دا مافی تَرے توں تیرا بندہ مالکا

تیری رحمت دی کرم دی لوڑ ہر تھاں مالکا
کر کرم کہ یاد تیری میں ناں بھلاں مالکا

میرے دل دی اُجڑی روہی وسادے مالکا
رحمتاں دا مینہ ذرا زوریں ورھا دے مالکا

تیری رحمت تے کرم دی لوڑ ہر دم مالکا
کر کرم ہُن توں کریم توں ایں اکرم مالکا

سچ تے رکھیں جھوٹ توں ہر دم بچاویں مالکا
توں صراطِ مستقیم اُتے چلاویں مالکا

اوہناں سنگ رکھ جیہناں تے انعام تیرا مالکا
ذکر کردے جہڑے صبح و شام تیرا مالکا

دُور اوہناں توں رہواں مغضوب جہڑے مالکا
پاسے رکھ اوہناں توں نے معتبوب جہڑے مالکا

تیرے ہاتھوں کیہڑا دکھیاں نوں سنبھالے مالکا
تیرے ہاتھوں کیہڑا دکھ جو ساڈے ٹالے مالکا

ہر طراں دا شرک رکھیں دُور میرے مالکا
رہن بس توحید دے ای دل چ ڈیرے مالکا

ہر گھڑی دل بس رہوے تیرے ای وے مالکا
میرے تے ابلیس دا ناں وس چلے مالکا

میرے دل تے وی کدی اُترے تجلے مالکا
ساہواں دی تسبی تے ہووے اللہ اللہ مالکا

تیرے در تے ہے سدا جھولی وچھائی مالکا
جوت تیرے نام دی دل وچ جگائی مالکا

تیرے در توں ای لیا تیرا ای کھاہدا مالکا
شکر تیری حمد دا ملیا اے جادہ مالکا

تیری نصرت مل گئی کم میرا بنیاں مالکا
تیری رحمت دا اے تنبو سرتے تنیاں مالکا

ہر طرف تیرے کرم دا نُور چمکے مالکا
تیرے ای نُوروں دِلاں دا طُور چمکے مالکا

سینیاں دے راز تیرے توں نہیں اوہلے مالکا
تیری تکرّی جھول باجھوں پورا تولے مالکا

عزّتاں والاں ایں دیہہ مینوں وی عزّت مالکا
بخش دیہہ آلِ محمد دی موّدت مالکا

مصطفےٰ دے پیاریاں دا پیار دے دے مالکا
اُلفتِ صدیق یارِ غار دے دے مالکا

ہتھ تیرے زندگی تے موت میری مالکا
نُور تھیں چمکا دوں توں گور میری مالکا

غیر ولوں دل مرے نوں خالی کردے مالکا
میرے من چوں کڈھ دے ظلمت نور بھر دے مالکا

صِبْغَةَ اللّٰهِ رَنگ مینوں وی چڑھاویں مالکا
نفس دے ہر ڈنگ توں مینوں بچاویں مالکا

نعمتاں توں اَن گنت مینوں کھوایاں مالکا
نہیں جو منگیاں اوہ وی توں جھولی بچ پایاں مالکا

دھرتی نوں زندہ کریں توں مینہہ ورھا کے مالکا
دیندا ایں قدرت وکھا توں پھل کھڑا کے مالکا

میریاں سوچاں توں رکھیں خیر ولے مالکا
ناں کدے جاواں کسے وی غیر ولے مالکا

حاضری دی عرضی

تیرے در تے اُون دا ورھیاں توں چا اے مالکا
میرے دل دی آس اے ، ایہو دُعا اے مالکا

میں وی تیرے گھر دے آکے لاواں پھیرے مالکا
جتھے ہر ویلے رہوَن رحمت دے ڈیرے مالکا

میں وی تے بلد الامین آویکھاں تیرا مالکا
لا لواں میں اوتھے ای فر پکا ڈیرا مالکا

اپنی پیشانی تری سردل تے رکھاں مالکا
بخشواواں تیرے کولوں جُرم لکھاں مالکا

کعبے دے نیڑے بہواں کعبے نوں ویکھاں مالکا
لکھ دے اوہ گھڑیاں کرم تھیں وچ لیکھاں مالکا

اپنے جُرماں دی سیاہی آکے دھواں مالکا
پا پٹا گل وچ ترے در تے کھلواں مالکا

پا کے گل کفنی صفا مروہ تے دوڑاں مالکا
کچھ اثاثہ آخرت دے لئی میں جوڑاں مالکا

حجرِ اسود چُم کھاتہ چٹا کرلاں مالکا
تیرے بُوہے بہہ کے لاهِ محشر دا ڈر لاں مالکا

میں حطیم اندر گزاراں کچھ تے گھڑیاں مالکا
دیر توں دل وچ مرے آساں نے بڑیاں مالکا

وچ حطیم آکے نفل میں وی گزاراں مالکا
منگاں مانی لیکھ انج وگڑے سنواراں مالکا

اپنی قسمت دا پھیرا ویکھاں اُچا مالکا
تیتھوں لے لاں مغفرت دا موتی سُچا مالکا

چُم لوواں رُکنِ یمانی میں وی آکے مالکا
منگ لاں رحمت تری جھولی وچھا کے مالکا

اگلے پچھلے سارے جُرماں نوں قبولاں مالکا
تیرے کولوں بخششاں آکے وصولاں مالکا

باری اکھیاں دی ناں میں اک پل وی ڈھوواں مالکا
کعبے دے انوار انج دل وچ سموواں مالکا

رحمتاں دے نوری بدّل ورھ دے ویکھاں مالکا
سوہنے جلوے تیرے نوری گھر دے ویکھاں مالکا

تیرے در دے ویکھاں آکے نوری جلوے مالکا
نور دے چل دے سمندر جو تیرے نے مالکا

جتھے مل دی اے مراد اوہ گھر میں ویکھاں مالکا
بخششاں دا جتھوں مل دا زر میں ویکھاں مالکا

جتھے ہر ویلے تجلی وکھری آوے مالکا
میں وی ویکھاں نوری منظر اہ دُعا وے مالکا

جتھے ہندا رات نوں وی دن دا منظر مالکا
جتھوں آکے نُور لیندے ماہ و اختر مالکا

تیری رحمت مار دی اے جتھے چھلاں مالکا
بھل جتھے جانڈیاں بندے نوں گلاں مالکا

ہر گھڑی جتھے رہوے تیری عنایت مالکا
اوتھے آواں میں وی اہ دیویں سعادت مالکا

تیری رحمت دے سہارے تے میں آواں مالکا
سُن لوں اہ التجاواں اہ صداواں مالکا

کوڈیوں کھوٹے دا چنگا مُل پادے مالکا
اِس نمانے نوں وی اپنا در وکھادے مالکا

کھا کھجوراں پیواں میں رج رج کے زم زم مالکا
تیری رحمت تے گذاراں شکر ہر دم مالکا

نُوریاں دا جتھے ہر ویلے ہے ڈیرا مالکا
ویکھ لاں آکے حرم دا میں چوہیرا مالکا

اوہ حرم جتھے سدا ورھدی اے رحمت مالکا
میں وی آ ویکھاں دوں مینوں وی ہمت مالکا

جتھے زائر پھر دے نے بن بن کے جھلے مالکا
بھر دا ایں جتھے کرم دے نال پلے مالکا

جتھے ہندا ای کدی وی نہیں ہنیرا مالکا
ویکھ لاں میں نُوری نُوری در اوہ تیرا مالکا

جتھے آکے بھُل جانَدے دُکھ سارے مالکا
میں بہواں آکے ترے سوہنے دوارے مالکا

جتھے مرداں عورتاں دا فرق مُکے مالکا
جتھے بندہ تیرے ڈرتوں اکھ ناں چھکے مالکا

جتھے آپو اپنی پیندی اے سبھ نوں مالکا
پیش رکھدے سبھ دے سبھ تیرے ادب نوں مالکا

جتھے رحمت دی رہوے ارزانی میرے مالکا
ویکھ لاں میں نور دے منظر چوہیرے مالکا

جتھے ابراہیم نے ڈاھیا مصلے مالکا
جتھے اسمٰعیل کیتی اللہ اللہ مالکا

جتھے رکدی اکھ دی نہیں اشکباری مالکا
کر دے جتھے آن مومن آہ و زاری مالکا

اوہ حرم جتھے کرم تیرا ودھیرا مالکا
میرا وی پے جائے اوتھے فیر پھیرا مالکا

آکے تیرے درتے میں وی کرلاں عرضاں مالکا
دُور ہوون دلدیاں اہ گلی مرضاں مالکا

بابِ کعبہ نُوں لواں میں وچ کلاوے مالکا
چھیتی ویلا حاضری دا فیر آوے مالکا

آکے میں ویکھاں نبی دا نوری حُجرہ مالکا
جتھے ہر دم نُوریاں دا لگیا ڈیرہ مالکا

اوہ میں گھر ویکھاں جتھے سرکار آئے مالکا
جتھے رہندے نے تری رحمت دے سائے مالکا

حُجرہ ویکھاں جتھے سی نبیاں پڑھیاں نعتاں مالکا
خُوراں تے مکاں جتھے پڑھیاں صلوتاں مالکا

حُجرہ جتھے آمنہ دا چن چڑھیا مالکا
سی قصیدہ لامیہ عمران (۱) پڑھیا مالکا

ویکھ لاں غارِ حرا اوہ نُوری مسکن مالکا
جتھے ورھدا تیری اے رحمت دا ساون مالکا

کملی والے نے جتھے کیتی اے زاری مالکا
ویکھاں جتھے وجی تُوں پہلی اُتاری مالکا

دُب ناں جاون آس میری دے سفینے مالکا
اپنی رحمت نال لے جاویں مدینے مالکا

اوہ مدینہ جس دا رُتبہ عرشوں اعلیٰ مالکا
اوہ مدینہ جتھے وسدا سب دا آقا مالکا

ویکھ لاں سوہنے دی نگری نوری نوری مالکا
جتھے ہندی منگتیاں دی آس پوری مالکا

ویکھ لاں گنبد میں ساوا کم بنا دے مالکا
کر کرم رکھ لے بھرم طیبہ دکھا دے مالکا

خاک جس دی کیتی توں خاک شفا اے مالکا
اوہ وکھا طیبہ جتھے ہر دم ضیا اے مالکا

ذکر تیرے دی سدا مالا پروواں مالکا
ہوون دل وچ یاد تیری نال لوواں مالکا

دُعاواں

تُوں ایں باسٹ روز مینوں دیویں گُھلا مالکا
رکھاں میں لوکاں لئی وی تتا چُلیا مالکا

دُور کر دیویں مِرے سر توں خزاواں مالکا
گھل ساڑو دُھپ دے وچ ٹھنڈیاں ہواواں مالکا

درد میرے ودھ گئے نیں دیویں دارو مالکا
تیرے باہجھوں کون میرا کم سارو مالکا؟

میں لکھے نے اپنے ہتھیں لیکھ کالے مالکا
جرم میرے تیری رحمت دے حوالے مالکا

من دا ہاں میں وی کیتی اے جیہڑی مالکا
رحم کر کے تار دے دُب چلی بیڑی مالکا

امتحاناں توں بچا کمزور میں ہاں مالکا
تیرے باہجھوں کس نوں دل دا حال آکھاں مالکا

میں ہاں کھوٹا کر دوں آپے کھرا تُوں مالکا
کوہجیاں دا کملیاں دا آسرا تُوں مالکا

میں ہاں بڑبولا کولے بول بولے مالکا
جرم میرے رکھے توں لوکاں توں اوہلے مالکا

اَن گنت توں نعمتاں مینوں کھوایاں مالکا
شکر کیتا نہیں کراں میں کج ادائیاں مالکا

رحمتاں توں کیتیاں حدّوں پرے نیں مالکا
میں کوئی کم کار کد کیتے کھرے نیں مالکا

بُھل دا ہر ہر قدم اُتے رہیا ہاں مالکا
بے عمل جھوٹا فریبی روسیہ ہاں مالکا

آن ڈُگیا ہاں ترے اُچے دوارے مالکا
دُور کر دیویں مرے سارے خسارے مالکا

مینوں منگن دا نئیں اَوندا طریقہ مالکا
تُوں کریم ایں دیہہ سکھا مینوں سلیقہ مالکا

نفس میرے دا اہ زوروں ناگ شوکے مالکا
تیرے ہاتھوں کون اس ظالم نوں پھوکے مالکا

مینوں بد عملی تے اہ لاوے دھگانے مالکا
جرم دی راہ تے لیاوے کر بہانے مالکا

اَنْتَ سُبْحَانَكَ تے میں مجرم گناہی مالکا
ظالماں چوں ہاں غلط راہاں دا راہی مالکا

اَتِنَا فِي الدُّنْيَا حَسَنَه سُن دُعاواں مالکا
آخرت وی تیرے کولوں چنگی چاہواں مالکا

عرضی میری اہ وی ہُن منظور کر لئیں مالکا
اگ جہنم دی مرے توں دُور کردیں مالکا

کھول ناں توں میرے عملاں والا چٹھا مالکا
بخششاں دا کر عطا میوہ توں مٹھا مالکا

رَبَّنَا اغْفِرْ لِي صَدَا سُن لے کرم کر مالکا
آن وُگیا اے گناہی آترے در مالکا

میریاں جُرمّاں دے اُتے پردے پاویں مالکا
رُوسیہ نُوں موت ویلے وی بچاویں مالکا

شمع تیری یاد دی میں دل چچ بالاں مالکا
ذکر تیرے تھیں میں گھر اپنا اُجالاں مالکا

ذکر دی بُوٹی مرے دل وچ وی مہکے مالکا
ذکر تھیں اہ رُوح دا پنچھی وی چہکے مالکا

ذکر تھیں جنگال دل دا دُور کر لاں مالکا
جھولی رحمت تھیں میں وی بھرپور کرلاں مالکا

دل مرے دی اُجڑی بستی فیر وے مالکا
بُٹھ مینوں اپنی تُوں اُلفت دے رے مالکا

ذکر دی مستی مرے دل نوں چڑھا دے مالکا
غیر سوچاں نوں توں میرے مغروں لاہ دے مالکا

بخش اپنے پیار دا سُچّا نِگینہ مالکا
قلب دا اِہ نُور تھیں بھر آبِگینہ مالکا

بخش دیہہ صبر و رضا وی اعلیٰ دولت مالکا
توں ایں راحم کردویں عاصی تے رحمت مالکا

بُھل کے وی جھوٹھ دے ولے ناں جاواں مالکا
سچ بولاں پورا تولاں سَکھ ہنڈاواں مالکا

ہُن غماں دے بحر چوں کڈھ دے سفینہ مالکا
کر دے میرے دل تے وی نازل سکینہ مالکا

منگ دا نہیں میں ترے توں پِلی مَر لے مالکا
بخش دیویں من لویں اِہ میرے تر لے مالکا

ہر طرح دے خوف توں مینوں بچاویں مالکا
رُوح دیاں بیماریاں اِہ مغروں لاہویں مالکا

نعمتاں نے اَن گنت تُوہیوں کھوایاں مالکا
مشکلاں نے دُور میرے توں ہٹایاں مالکا

کردا ایں سبھ دُور میرے توں بلاواں مالکا
 کردا رہندا ایں ہمیشاں توں عطاواں مالکا

ظُلُمِتاں چوں کڈھ ، دوں مینوں اُجالے مالکا
 تیری رحمت دے ملن ہر تھاں حوالے مالکا

ٹھیل دتی بیڑی میں تیرے سہارے مالکا
 کر کرم اپنا تے لا دیویں کنارے مالکا

آسرے تیرے زمیں دی گوڈی کیتی مالکا
 اشک سٹے ، سٹیاں دی کیتی نیتی مالکا

کر دوں وِتر کرم تھیں فصل ساری مالکا
 جھاڑ بوہتا دے عمل دی ہر کیاری مالکا

تیری رحمت دا جے بدّل رج کے وِستے مالکا
پنگرن گے پیچ اہ سکے تے تے مالکا

فصل گڈ کے تیری رحمت نُوں بلاواں مالکا
تیتھوں منگاں دُھپاں تیتھوں منگاں چھاواں مالکا

تیری رحمت سداں تیرے وِستے ویکھاں مالکا
رحمت اپنی لکھ دویں وچ میرے لیکھاں مالکا

تُوہیوں میرے مُردہ دل نُوں بھاگ لائے مالکا
خشک صحرا رُوح وچ گلشن کھڑائے مالکا

باغ دے وچ تیرے نیں وکھرے نظارے مالکا
پھل کھڑائے توں ہزاراں پیارے پیارے مالکا

گہاہ تے ویکھے کھلرے شبنم دے موتی مالکا
ویکھی گلشن دی میں ہر شے نہاتی دھوتی مالکا

پُھل گلاباں دے تری رحمت تھیں ہسن مالکا
کلیاں تینوں اپنے دل دی گل دسن مالکا

تیری رحمت ولے نرگس دی نظر اے مالکا
گھلیا سبھناں تے تیرا نوری در اے مالکا

تیرے ولے ویکھدا سورج مکھی اے مالکا
ہتھ چک جنج دُعا کردا دُکھی اے مالکا

کونلاں تے مور طوطے آرہے نے مالکا
گیت تیری حمد دے ای گارہے نے مالکا

ذّرہ ذّرہ تیری قُدرت دا گواہ اے مالکا
قطرہ قطرہ دسدا تیری ہی راہ اے مالکا

ٹہنیاں نیں تیرے ولّے بانہواں چُگیاں مالکا
دُور تیرے ذکر توں جو پل چ سُکیاں مالکا

پنچھیاں دے لب تے ہے تیرا ترانہ مالکا
توں چگاویں تے کھواویں پانی دانہ مالکا

ونڈ دا ایں رحمتاں توں رہ کے اوہلے مالکا
تُوں ایں بھر دا سب دے ای خالی بھڑولے مالکا

اپنے ولّے تیری رحمت ہے بِلاوندی مالکا
بھکھیاں نوں ذات ہے تیری رجاوندی مالکا

تیری عظمت دا نشان سرگی دا تارا مالکا
فضل کُل مخلوق تے ہے تیرا بھارا مالکا

پتہ پتہ تیری عظمت دس رہیا اے مالکا
ابرِ رحمت تیرا ہر دم وِس رہیا اے مالکا

اپنے منکر نوں وی توں ہیں رزق گھلدا مالکا
تیرے گُن تھیں اے نظامِ عالم دا چلدا مالکا

مار کے واجاں بھلاویں اپنے پاسے مالکا
ونڈ دا ایں رزق نعمت خوشیاں ہاسے مالکا

میرے دل چوں کڈھ دویں سارے بھلیکھے مالکا
ایہہ نکمّا صرف تیرے ولّے ویکھے مالکا

مومناں تے منکراں نوں رزق گھلیا مالکا
ہر کوئی اے تیرے ای بُوہے توں پلپیا مالکا

کر قلم زد میرے سب جُڑماں دے کھاتے مالکا
ایہو کردا ہاں دُعا راتے براتے مالکا

میں ہاں کوڑا ، کوڑ میرا وی پھبا دے مالکا
نفس میرے نوں مرے مگروں ای لاہ دے مالکا

کھوٹا ہاں پاسے دا سوہنا آپ کردے مالکا
کر عطاواں ٹھوٹھا میرا آپے بھر دے مالکا

تُوں سَمِیْعِ ایں سُن دا ایں سبھناں دی زاری مالکا
ماف کردیں ہُن خطا میری وی ساری مالکا

تُوں قدیر ایں رکھدا ایں ہر شے تے قُدرت مالکا
تُوں نصیر کر دویں مشکل چِج نُصرت مالکا

میرا ہر اوکڑ دے وِچ مُشکل کُشا ایں مالکا
تُوں مرا حامی مرا حاجت روا ایں مالکا

پلا بھر تیرے تُوں ہے خیرات منگی مالکا
بخششاں دی تیرے تُوں سوغات منگی مالکا

ڈوری اے تقدیر دی تُوہیوں ہلاوندا مالکا
منگتیاں نوں تخت تے تُوہیوں بٹھاوندا مالکا

قہر دا دروازہ جے کر کدھرے کھولیں مالکا
تاجاں والے چاہویں تے گھٹے چِج رولیں مالکا

کالی راتوں دیندا ایں نُوری سویرے مالکا
کوئی وی نئیں جان سکیا راز تیرے مالکا

بدلاں وچ بجلیاں نوں تُوہیوں تاڑیں مالکا
ہسدے وسدے شہر تُوں پل وچ اُجاڑیں مالکا

دُور کردیویں مرے سر توں بلاواں مالکا
ذکر تیرا ای کراں تینوں دھیواں مالکا

تسبی تیرے نام دی ہر پاسے جاری مالکا
ذکر تیرا کر دی اے مخلوق ساری مالکا

نُور تیرے نال چمکن کہکشاواں مالکا
تُوہیوں گھلیاں ہاڑ دے وچ سرد واواں مالکا

دھرت دے سینے چ رکھے تُوں خزینے مالکا
تُوں تراویں پانیاں اُتے سفینے مالکا

چھڈ دیاں میں ہر تعلّی خود نمائی مالکا
پلے وچ پا عجز دی اعلیٰ کمائی مالکا

تیریاں تے رہیاں نے ہر دم عطاواں مالکا
کیتیاں میں جان بجھ کے وی خطاواں مالکا

نفس ہتھوں ہو گیا مجبور ہاں میں مالکا
عُذر منّ میرا کہ بس معذور ہاں میں مالکا

میری اپنی کیتی میرے اگے آئی مالکا
مینوں دیویں آپے ہی غم توں رہائی مالکا

کم کوئی وی ناں کیتا میں سُجبا مالکا
ساری لوکائی دے وچ میں ہاں پُگجا مالکا

ہاں نکما منگ دا ہاں تیری رحمت مالکا
کر نظر تے بخش مینوں نیک فطرت مالکا

ایسے لئی تے رحمتاں دا لوڑ وند ہاں مالکا
قبر دی سختی توں ڈاڈا فکر مند ہاں مالکا

تیرے باہجھوں حال دل دا کس نوں دسّاں مالکا
تُوں وساویں رحم کر کے تے میں وسّاں مالکا

نفس اے مونہہ زور نہیں قابو پج اَوندا مالکا
ہر گھڑی اے مینوں پُٹھے پاسے لاوندا مالکا

چنگے کتوں روکدا بھیڑے نوں کھڑ دا مالکا
جناں ڈکاں سرتے ای اہ جاوے چڑھ دا مالکا

نفس ہتھوں رُوح مری مجبور ہوگئی مالکا
ٹھنڈ پے جائے عرض جے منظور ہوگئی مالکا

ہاں بڑا کمزور توں طاقت عطا کر مالکا
پوری اس عاصی نکتے دی دُعا کر مالکا

اکھ کر دے پاک تے دل صاف کردے مالکا
مجرم آں میں رحمتاں تھیں ماف کردے مالکا

دھوڑ اہ جُرمیں دی میں آپ اے اُڈائی مالکا
شان ، کرْمَنّا توں میں اپنی گھٹائی مالکا

تیرا بُوہا چھڈ کے غیراں توں منگیا مالکا
ایس بھیڑے کم توں میں کد ہاں سنگیا مالکا

تیرا کھا کے ہوراں دے میں نانویں لایا مالکا
نعمتاں لئیّاں سدا تینوں بھلایا مالکا

دُنیا پچھے ہاں گیا تینوں بھلا کے مالکا
بخش دے ہُن آگیا حماں سنا کے مالکا

گھیرا اے مرضاں نے پایا کتھے جاواں مالکا
توں ایس شافی تیرے در مُڑ مُڑ کے آواں مالکا

موت اے کردی پئی مُڑ مُڑ اشارے مالکا
چکے جُرمّاں دے نے سرتے بھار بھارے مالکا

اِکو ہے ہُن آرزو لا اپنے وئے مالکا
تُوں کریم ایں آن وں دِل دے محلے مالکا

دِل دیاں جُڑ جان تیرے نال تاراں مالکا
کچھ وی ناں چیتے رہوے تینوں پُکاراں مالکا

خواہشاں دے بُت ذکر کر کے توڑاں مالکا
صرف تیرے نال سچا ناٹھ جوڑاں مالکا

متھے اُتے مَل کے جُرموں دی سیاہی مالکا
بخششاں منگن لئی آیا گُناہی مالکا

جُرم کردا ہاں رہیا نہیں کسر چھڈی مالکا
میرے جُرموں توں تری رحمت ہے وڈی مالکا

بخشیں میرے جرمِ صدقہ مصطفیٰ صلی اللہ علیہ وسلم دا مالکا
مان رکھ لئیں ایس مجرم پُر خطا دا مالکا

کر کرم رکھ لے بھرم نادار آیا مالکا
دیہہ شفا در تے ترے بیمار آیا مالکا

تیری رحمت دی طلب کر آس پوری مالکا
ہُن ہمیشہ ای رہوے جرماں توں دُوری مالکا

ہے گھٹا سر تے غماں دی چھاگئی مالکا
آئی بیماری تے سب خوشیاں مٹا گئی مالکا

بُھل اپنی مینوں ہر اک یاد آوے مالکا
جرم میرا آن کے مینوں ڈراوے مالکا

اپنے کالے عملاں تے ہاں شرمندہ مالکا
کر کرم ناں جُرم کر پاواں آئندہ مالکا

ذکر تیرے دا میں چرخہ روز ڈاہواں مالکا
اگلے گھر لئی داج عملاں دا بناواں مالکا

ساہواں دے چرخے تے کتّاں ذکر پُونی مالکا
شکر کردا راں میں کھا کے مِسی لُونی مالکا

جھوٹھ توں ہر ہر گھڑی مینوں بچاویں مالکا
سچ دی راہ تے ہمیشاں ای ٹُراویں مالکا

کبر دی ظُلمت ناں میرے کول آوے مالکا
صبر دی راہ ول ای میرا پیر جاوے مالکا

سُرگی ویلے اُٹھ میں ڈاہواں مصلیٰ مالکا
بھل بخشاواں میں ہو دُنیا توں کلا مالکا

میری اکھ توں پردہ غفلت دا ہٹا دے مالکا
ہُن صراطِ مستقیم آپے وکھا دے مالکا

مرضِ رُوحانی ہے چوکھا دیہہ شفاواں مالکا
تُوں ایں مولا میں موالی تے گداواں مالکا

رُکھ میری آس دے ہُن کردے ساوے مالکا
پھل پھل چوکھا کرم تیرے دا آوے مالکا

حرص دے پچھے میں اُنھے واہے ٹُریا مالکا
کنڈے جُزماں دے میں پلے پا کے جُھریا مالکا

واشکروولی تے عمل کیتا کدی نہ مالکا
صبر دا وی جام میں پیتا کدی نہ مالکا

تُوں غیاث المستغیثین ایں کرم کر مالکا
دُور میرے تُوں اے سب دردو اَلَم کر مالکا

جھوٹھیاں نے سچ کوڈی مُل کیتا مالکا
دیوا میں سچائیاں دا گل کیتا مالکا

تڑکیا سوچاں دا شیشہ لفظ بُھلے مالکا
موتی عملاں دے مری جھولی چوں دُھلے مالکا

سُک گئی آساں دی کھیتی فِری ہری کر مالکا
چارہ ساز ایں میری ہُن چارہ گری کر مالکا

سدّھراں دے باغ تے آون بہاراں مالکا
تیری رحمت تے کرم نوں واجاں ماراں مالکا

دُنیا داری دے ہاں میں کھو بے بچ گھبا مالکا
ظلمتاں دے بحر وچ آپے ہاں دُبا مالکا

میرے عملاں وٹوں نے خالی کچاوے مالکا
بھار جُرماں دا میں سرتے چک لیاوے مالکا

توں ناں دیویں تے سہارا کون دیوے مالکا
توں ناں گھلیں تے کھواوے کون دیوے مالکا

جنہاں اُتے مان سی ہو گئے بگانے مالکا
بیلی وی دیکھے نے سب گھر نوں سیانے مالکا

چھڈ گئے سب یار میرے مینوں کلا مالکا
کولوں دی لنگھ گئے نیں سارے جھاڑ پلا مالکا

اُکڑاں وچ کوئی وی اوندی نئیں لاگے مالکا
سارے رشتے لگ دے نیں کچے دھاگے مالکا

تیریاں یاداں نے رکھیا مان میرا مالکا
شکر کردا ہاں میں لکھ وار تیرا مالکا

جھوٹھیاں دی ہو رئی اے بے بے مالکا
سچے سچے جھوٹھیاں کر دتے کلے مالکا

پائیاں جُرمیں دیاں رُوح تے جھرہٹاں مالکا
جُرم اوندے ساہمنے جد اکھاں میٹاں مالکا

مینوں میرے نفس نے ہے بوہت جھنبیا مالکا
اپنے عملاں نوں ہاں تک بوہت کنبیا مالکا

عمر لنگھ گئی کجھ نیں کیتی کار چنگی مالکا
چھپے مڑ کے دیکھ کے میں جاواں سنگی مالکا

دُنیاں خصماں کھانی دے چھپے رہیا ہاں مالکا
تُوں بچاویں ہف کے ہن میں ڈگ پیا ہاں مالکا

گلّیں باتیں وقت میں سارا لنگھایا مالکا
اپنے کرتوتاں نوں لوکاں توں لُکایا مالکا

جان کے بھلیا رہیا ہاں راہ تیری مالکا
پکی ناں رکھی کدی وی چاہ تیری مالکا

غیر دے بوہے تے جا بہندا رہیا ہاں مالکا
دُنیا دے کچھے سدا پیندا رہیا ہاں مالکا

تیرا دتا کھا کے لایا غیر دے ناں مالکا
اپنی ناشکری تے ہن میں پچھوں تاہاں مالکا

جھوٹھ سچ لوکاں نوں دس کے کم سارے مالکا
جھولی اپنی وچ میں پالے خسارے مالکا

اپنے دل نوں دتی میں جھوٹی تسلی مالکا
یاد آوے مینوں غلطی کئی کئی مالکا

مسلی جسراں عملاں دی چادر میں کیتی مالکا
دُور ناں ہوئی مرے اندروں پلیتی مالکا

دل تے پائے جُرمِاں والے داغ کالے مالکا
عملاں دے حجرے نوں آپے مارے تالے مالکا

کنج بھلا میں جُرمِاں تیرے توں لکھوواں مالکا
ایہو سوچاں سوچدا بک بک میں روواں مالکا

دُور کردے تنگیاں بیماریاں ہُن مالکا
سُن لوں ساجد دیاں وی زاریاں ہُن مالکا

وطن لئی دُعاواں

دیس میرے تے ہے آیا ویلا اُوکھا مالکا
بھیج کے امداد آپے کردے سوکھا مالکا

کافراں اَنج ساریاں نیں کیتا ایکا مالکا
چاراں پاسے مومناں نوں لگیا سیکا مالکا

مومناں وچ فرقہ بندی بوہت ودھ گئی مالکا
نفرتاں دی اگ دی وی ہو اے حد گئی مالکا

گولیاں دی بارش اک دوجے تے کردے مالکا
گل حق تے سچ دی نہیں ہن تے جر دے مالکا

کافراں توں مال لے ایمان وچن مالکا
ملاں ملوانے کئی قرآن وچن مالکا

دین دے حکماں نوں بھلے اج دے قاضی مالکا
بھل گئے نے حق تے اوہ سوہنا ماضی مالکا

حملے ہوون مسجداں تے لہو وچ دُبیّاں مالکا
پُرزے پُرزے نال بمباں لاشاں ہویاں مالکا

بے قصورے مر رہے نے وچ مسیتاں مالکا
ایہہ کدوئیں نین چنگلیاں مومن لئی ریتاں مالکا

وانگ بھنڈاں مولوی منبر تے بولن مالکا
بولنوں پہلوں کوئی ناں گل تولن مالکا

گھیریا سیلاب نے پردیس میرا مالکا
رحم منگاں رحم منگاں تہیوں تیرا مالکا

ہڑنے ہر پاسے مچا دتی تباہی مالکا
پھر گئی دھرتی دے مُنہ تے اج سیاہی مالکا

پھٹ دے بدّل پانی زوریں ورہ رہیا اے مالکا
ناں بچے انساناں ناں ای گھر رہیا اے مالکا

پتھراں دا ویکھ کے سیلاب خُونی مالکا
ودھ گئے نے درد نالے بے سکونی مالکا

ماواں توں وچھڑے نے پُتر دھیاں روون مالکا
کتھے جاون کلّیاں کتھے کھلوون مالکا

ڈھور ڈنگر رُڑھ گئے کجھ نہیں بچیا مالکا
رحم کردے ساڈے اُتے ساڈے سچیا مالکا

تر لے من لے رحم کردے ہاں گناہی مالکا
کر لئی اے قوم نے اپنی تباہی مالکا

بن گنیاں نے مسجدیں وی قتل گاہواں مالکا
کتھے جا کے لبھاں میں دس دے پناہواں مالکا

سود خوراں مومنناں دا خون پیتا مالکا
ظالماں نے ظلم اُتے ظلم کیتا مالکا

ڈاکواں دا راج اے دن ویلے لٹن مالکا
جے ناں کجھ لبھے غریباں نوں پئے کٹن مالکا

ظلم دی اے جھل گئی ہُن لال نہیری مالکا
رحم کردے رحم کر لاویں ناں دیری مالکا

دیس میرے تے کرم کردے کریم ایں مالکا
توں ایں راحم توں ایں ارحم توں رحیم ایں مالکا

دیس میرے ول گھل ٹھنڈیاں ہواواں مالکا
دور کردے غم دیاں سبھے بلاواں مالکا

پُھل خوشیاں دے کھڑن مُڑ کے چو فیرے مالکا
فیر وِسں ہڑتھیں جو اُجڑے نیں ڈیرے مالکا

جیہناں دے اُجڑے نے گھر اوہ فیر وِسں مالکا
روناں دھوناں مکے سارے فیر ہسن مالکا

رُڑھ گئے جنہاں دے دانے فر گھلا دے مالکا
خیر والا توں سخی ایں خیر پا دے مالکا

دیس وچ پھٹن خوشی دے فر سویرے مالکا
عرض کیتی اے میں روکے آگے تیرے مالکا

ہنجواں نوں موڑناں نہیں ریت تیری مالکا
عرضاں مَن لئیں گل بن جائے فیر میری مالکا

پورے کروا دے جو چنگے کم چھڑے مالکا
توں جے چاہویں چھیتی لگ سک دے نے نیڑے مالکا

حمد جو لکھی اے میں دیہہ چھاپ چھیتی مالکا
میرے لئی کم اوکھا اے کر آپ چھیتی مالکا

ساجد اے مجرم گناہی پاک تیری ذات اے
منگ دا اہ رحمتاں تیرے توں خیرات اے

سوہنیا ربّا

سوہنیا ربّا ترے در اُتے آیا اے گدا
صدقہ سوہنے مصطفیٰ دا ایس دی جھولی چ پ

سوہنیا ربّا کرم تھیں دے سدا رزقِ حلال
اپنی رحمت صدقے میرے سارے ای بٹرنوں پال

سوہنیا ربّا مری اولاد نوں وی رکھیں نیک
تیرے الطاف و کرم دی ہی رہوے ایہناں نوں ٹیک

سوہنیا ربّا مرے ماں باپ تے رحمت کریں
قبر وچ ایہناں دی مولا نور بخشش دا بھریں

سوہنیا ربّا دویں درجات دونواں نُوں بلند
قبری دے وچ ہووے ایہناں تے رحمتاں تیری انند

سوہنے ربّا میرے نانے دادے نُوں وی ماف کر
دوہاں دا کھاتہ وی اپنی بخششاں تھیں صاف کر

سوہنیا ربّا میری نانی دادی تے کردے کرم
اوہناں اُتے آوے نہ قبریں کوئی وی رنج و غم

سوہنیا ربّا تُوں تے بخشنہار ایں ستار ایں
تُوں دُعاواں نال دیندا بخششاں غفار ایں

سوہنیا ربّا ساڈے جُرماں نوں مٹا دے کر کرم
رحم فرما ساڈے تے آوے ناں مولا کوئی غم

سوہنیا ربا کریں تُوں پلصراطوں مینوں پار
تیری رحمت دی ہی لوڑ مینوں میرے کردگار

سوہنیا ربا توں ایں حامی توں میرا مستعان
آخرت وچ بخششاں تے مینوں رحمت کردیں دان

سوہنیا ربا میں رتجھاں نال فر سجدے کراں
نیکیاں ہُن کول کردے بدیاں سب کر دے پراں

سوہنیا ربا نبی دی ساری اُمت بخش دے
تُوں کریم ایں تُوں رحیم ایں اپنی رحمت بخش دے

والیا ! کر دے عطا صدقہ نبی ﷺ لچپال دا
والیا ! بھر پلا صدقہ مصطفیٰ دی آل دا